



VIJEĆE ZA ŠTAMPU
u Bosni i Hercegovini

samoregulacijsko tijelo za štampane i on-line medije

Broj: 233-02/17
Datum: 20.07.2017.

ODLUKA

Žalbene komisije Vijeća za štampu u Bosni i Hercegovini

po žalbama građana na tekst
„Štaš oženit! Bosanskohercegovački Youtuber rasturio novim videom, kojeg je vidjelo milion ljudi (VIDEO)“, objavljen na portalu radiosarajevo.ba 28.06.2017.g.
i tekst „Štaš oženit/Hit na internetu: Kako Bosanac opisuje današnje žene“, objavljen na portalu slobodnabosna.ba 28.07.2017.g.

Žalbena komisija pozdravlja odluke uredništva portala radiosarajevo.ba i slobodnabosna.ba da uklone prenijeti sadržaj sa Youtuba pod naslovom „Današnje djevojke“, objavljen na njihovim portalima.

Komisija poziva i urednike drugih portala koji su objavili taj sadržaj da ga uklone.

Žalbena komisija apelira na uredništva medija da ubuduće izbjegavaju objavljivanje i davanje medijske pozornosti sadržajima koji promoviraju bilo koji oblik nasilja, diskriminacije, omalovažavanja, kao što je u konkretnom slučaju učinjeno u sadržaju videa „Današnje djevojke“, kada su u pitanju žene.

Povodom objavljivanja ovoga sadržaja u medijima, u Vijeće za štampu je pristigao veliki broj žalbi, 30, što smatramo pozitivnom reakcijom javnosti.

Također, Vijeće za štampu ohrabruje Žalbenike da koriste mogućnost prijavljivanja neprimjerenih sadržaja platformama na kojima su ti sadržaji originalno objavljeni, kao što je Youtube kanal i druge online platforme.

Vijeće za štampu u BiH je zaprimilo 30 žalbi građana na tekst „Štaš oženit! Bosanskohercegovački Youtuber rasturio novim videom, kojeg je vidjelo milion ljudi (VIDEO)“, objavljen na portalu slobodnabosna.ba 27.06.2017.g. i tekst „Štaš oženit/Hit na internetu: Kako Bosanac opisuje današnje žene“, objavljen na portalu radiosarajevo.ba 27.06.2017.g. U okviru tekstova je objavljen i sadržaj sa Youtuba, pod naslovom „Današnje djevojke“. Tekstovi su uklonjeni sa portala slobodnabosna.ba i radiosarajevo.ba.

U dostavljenim žalbama se, između ostalog, navodi: „Ovim putem se žalimo na objavljene članke portala <https://www.radiosarajevo.ba/multimedia/video/hit-na-internetu-kako-bosanac-opisujedanasnje-zene/266862> i http://www.slobodnabosna.ba/vijest/55158/sta_s_ozenit_bosanskohercegovacki_youtuber_rasturio_novim_videom_kojeg_je_vidjelo_milion_ljudi_video.html, u kojim promoviraju video s Youtube kanala blogera Amira Hadžića, pod nazivom 'DANAŠNJE DJEVOJKE'. Žalba se odnosi na govor mržnje koji sadrži objavljeni video i članci kojima se taj video promoviraju.

U videu 'DANAŠNJE DJEVOJKE' Amir Hadžić predstavlja ženske osobe kao seksualne objekte, opravdava silovanje, i potiče na nasilje nad ženama. Amir Hadžić započinje govor mržnje tvrdnjom da 'obmotane' (pokrivene) djevojke čuvaju moral, a one koje su 'razderane, izbušene, probijene,

1



VIJEĆE ZA ŠTAMPU u Bosni i Hercegovini

samoregulacijsko tijelo za štampane i on-line medije

razgolišene' ne mogu biti nazvane 'normalnima'. Nakon toga izjave u videu se baziraju na vrijeđanju ženskog tijela kako bi ukazao na 'poruku' koju žene šalju svojim izgledom, odnosno oblačenjem koje ističe njihove dijelove tijela. 'Poruka' koju žene svojim oblačenjem šalju muškarcima, po Amiru Hadžiću, jeste 'dođi, uzmi me za ruku, vodi me gdje hoćeš, i radi sa mnom šta hoćeš'. Navodi se da je to zapravo 'reklama njenog tijela'. Žene koje na taj način 'reklamiraju' svoje tijelo se opisuju kao 'loše supruge, još gore majke', te je sasvim očekivano da je muškarac u takvom braku 'degenjeći, nabije boksom, nabije nogom...!', čime se otvoreno poziva na nasilje nad ženama. Amir Hadžić također kaže da on nije 'nikakav moralista i anđeo', ali da zna šta je normalno, a to su žene koje se 'normalno' obuku i dotjeraju. 'Naravno da djevojka treba držati do sebe, da ne bude rugafet. Treba dlačurde da sječe, da se dotjeruje, da se miriše, da kad razgovaraš s njom znaš je li pričaš sa ženskom ili s međedom'. Zaključak videa je da djevojke koje su 'razderane, izbušene, probijene, razgolišene' ne postižu ono što 'misle da postižu', nego stvaraju kontra efekat. Amir Hadžić tvrdi da djevojke misle da ih se smatra 'dobrom mačkom', ali ustvari ih smatraju 'jeftinom i lahkom, i samo razmatraju međusobno na kafama kako bi te koji: bi l' te na sudoperu, stolu, ili frižideru'. Niko od 'normalnih' muškaraca takvu ne želi za majku svoje djece, kaže Amir Hadžić. To su žene koje žele 'skupe večere, torbe, čizme, mobitele, da joj sve to neko plaća, da svi vide kako ona živi na visokoj nozi'. A muškarci su ti koji sve to plaćaju zbog 'malo rupe', što ukazuje na objektiviranje ženskog tijela. Amir Hažić opravdava silovanje izjavom '...onda kaže desilo se silovanje... Pa gdje se neće desiti?! Sama provociraš momčice!''.

Žalbenici navode i sljedeće: „Portali radiosarajevo.ba i slobodna-bosna.ba ne samo da su prenijeli ovaj video, te samim tim širili govor mržnje i opravdavanje silovanja i nasilja nad ženama, nego su i tekstovima koji su pratili video pohvalili i istakli kao duhovit i relevantan: 'Nema sumnje da je osvojio simpatije mnogih. U videu 'Današnje djevojke' Amir se osvrće na polugole cure, govori o njihovom pretjeranom šminkanju, push-up grudnjacima, selfiejima, twerkanju, a veći dio videa govori o sponzoršama. (slobodna-bosna.ba)' i 'Počevši od pocijepanih pantalona, skupe odjeće i telefona, grudi i istaknute zadnjice, Amir Hadžić je opisao današnje žene. Njegovi snimci često nasmijavaju cijeli region, a sada se pozabavio današnjim trendovima, pa je rekao i kakve žene treba da budu, a kakve su danas. Većina njegovih fanova su se složili s njim, a pogledajte šta je sve ispričao. (radiosarajevo.ba). Smatramo da je prenošenjem i promocijom ovog videa prekršen Kodeks za štampu i online medije BiH, te zahtjevamo da se radiosarajevo.ba i slobodna-bosna.ba ograde od govora mržnje Amira Hadžića u videu kojeg su promovirali na svojim stranicama, te da osude govor mržnje kojim se žene predstavljaju kao seksualni objekti, te opravdava silovanje, i potiče na nasilje nad ženama. Također, zahtjevamo da se portali javno izvину ženama žrtvama silovanja i nasilja u porodici, zbog promovisanja narativa koji tvrdi da je žena kriva za silovanje, te da žene svojim izgledom i ponašanjem same izazivaju nasilje, fizičko i seksualno, te trebaju da ga očekuju“.

U skladu sa žalbenom procedurom, Vijeće za štampu u BiH uputilo je pismo uredništvima portala slobodnabosna.ba i radiosarajevo.ba.

U dostavljenom odgovoru se navodi: „U ime redakcijskog kolegija portala Radiosarajevo.ba u sastavu: Suada Peštek – direktorica, Amina Bijelonja – urednica, Amil Dučić – urednik i Vesna Andree Zaimović urednica i projekt managerica, izražavamo žaljenje što je došlo do ovog slučaja.

Svjesni smo da smo objavljivanjem ovog videa napravili propust do kojeg je došlo za vrijeme dežurstva jedne od naših novinarki. Odmah nakon prispjeća žalbi, sporni članak na portalu Radiosarajevo.ba, kao i adekvatna objava na društvenim mrežama, su uklonjeni. Već godinama je



VIJEĆE ZA ŠTAMPU
u Bosni i Hercegovini
samoregulacijsko tijelo za štampane i on-line medije

Radiosarajevo.ba u svojoj uredničkoj misiji snažno posvećen promociji ljudskih prava, prava žena, društva jednakih mogućnosti i osnaživanju civilnog društva. To dokazuje i naše kontinuirano ulaganje u tekstove i teme koje otvaraju građanski dijalog, kolumne eminentnih publicista, infografika kojima podižemo svjesnost društva i odgovornost vlasti te vidljiva promocija rada nevladinog sektora. Finansirani isključivo svojim radom (a ne javnim fondovima ili donacijama političkih subjekata) i u brojčano ograničenim ljudskim kapacitetima, uspijevamo održati ovakav urednički ugao, uprkos bitno drugačijim zahtjevima tržišta i sveopćoj banalizaciji žurnalizma.

U živoj dnevnoj dinamici od oko 100 članaka, razumljivo da će ponekad doći i do ovakvih propusta. Stoga izražavamo zahvalnost organizacijama civilnog društva i pojedinkama/cima na reakcijama, cijeneći njihovu građansku odgovornost.

Nama, također, nije problem objaviti javno izvinjenje, no iskustvo nas uči da bi ono u ovom trenutku izazvalo kontraefekt te još jednom usmjerilo pažnju javnosti na sporni video koji je i dalje dostupan na YouTubeu“.

Uredništvo portala slobodnabosna.ba nije dostavilo urednički stav.

Žalbena komisija Vijeća za štampu u BiH, na sjednici održanoj 20.07.2017.g. razmotrila je žalbe na tekst „Šta's oženit': Bosanskohercegovački Youtuber rasturio novim videom, kojeg je vidjelo milion ljudi (VIDEO)“, objavljen na portalu slobodnabosna.ba 27.06.2017.g. i tekst „Šta's oženit'/Hit na internetu: Kako Bosanac opisuje današnje žene“, objavljen na portalu radiosarajevo.ba 27.06.2017.g. i odgovor sa portala radiosarajevo.ba.

Žalbena komisija pozdravlja odluke uredništva portala radiosarajevo.ba i slobodnabosna.ba da uklone preneti sadržaj sa Youtuba pod naslovom „Današnje djevojke“, objavljen na njihovim portalima. *Komisija* poziva i urednike drugih portala koji su objavili taj sadržaj da ga uklone.

Žalbena komisija apelira na uredništva medija da ubuduće izbjegavaju objavljivanje i davanje medijske pozornosti sadržajima koji promoviraju bilo koji oblik nasilja, diskriminacije, omalovažavanja, kao što je u konkretnom slučaju učinjeno u sadržaju videa „Današnje djevojke“, kada su u pitanju žene.

Povodom objavljivanja ovoga sadržaja u medijima, u Vijeće za štampu je pristigao veliki broj žalbi, 30, što smatramo pozitivnom reakcijom javnosti. Također, Vijeće za štampu ohrabruje Žalbenike da koriste mogućnost prijavljivanja neprimjerenih sadržaja platformama na kojima su ti sadržaji originalno objavljeni, kao što je Youtube kanal i druge online platforme.

Žalbena komisija sugerira medijima objavu ove Odluke.

Članovi/ce Žalbene komisije: Dopredsjedavajući, advokat Dražen Zubak; urednik Fuad Kovačević; sutkinja Nada Arsenić; prof. dr Enes Osmančević; doc. dr Zlatiborka Popov Momčinović, novinar Muhamed Jusić, novinarka Suzana Mijatović i urednik Milan Šutalo.



Dopredsjedavajući
Žalbene komisije

Dražen Zubak